

Carlo Roberto Maria Redaelli
Arcivescul di Guriza

«Lui 'l è la nostra pâs»

LETARA TAL ZENTESIM ANIVERSARI
DAL INIZI DA LA PRIMA VUERA MONDIÂL

Sabotin, San Michêl, San Martin... Son i nons dome di cualchidun dai tancj lûcs, teatri di bataiis sanganosis, ricuardâts da lis plachis di bronz che acompagnin la salida al Sacrari di Redipua. No gi vevi dât tanta impuartanza a chiscj nons, cuant che, in gita scolastica di frut, vevi visitât chel lûc impressionant che aduna 100.000 soldâts muarts in vuera. Ju jai lets in maniera dal dut diferenta cuant che, pôc dopo l'anunzi da banda di papa Francesc da la sô intenzion di vignî a Redipua, pelegrin di pâs, ai 13 di setembar dal 2014, soi lât al sacrari.

A cuasi doi agns dal me ingrès ta diocesi di Guriza, jai oramai imparât a cognossi daûr di chei nons lis alturis dal Cjars e lis culinis intor di Guriza, dilunc dal Lisunz. Procuri di cjatâ fûr ancja i lûcs sacris a nazions che in chê volta jarin consideradis nemiis da l'Italia e che vuê son part da l'Union Europeana (e bastaressin i decenis di pâs garantîts da la intuizion di oms come Adenauer, Schuman, De Gasperi e altris par justificâ la esistenza da l'Union): il simiteri austro-ungaric di Foian e Redipua, la capela militâr di Visintini a Dobardò, preseada dai ongarês.

Ducj lûcs dulà che 100 agns indaûr jara stada puartada insom chê tragedia che, profeta no scoltât, papa Benedet XV veva definît "*inutile strage*". Tal palaz dal vescul, ca a Guriza, 'l è un ritrat di chist papa, opara da la pitora istriana Emma Galli, sintât contuna espression sconsolada, cun sul sfont di una banda la zitât di Guriza bombardada e di chê altra il puart di Monfalcon che brusa.

Tant sanc 'l è stât spandût dibant su chistis alturis e dilunc dal nostri flum. Sanc di zovins di armadis di tantis nazionalitâts, cuasi dutis di fede cristiana. E il massaci inutil ja vût una continuazion dopo cualchi desena di agns ta seconda vuera mondiâl, altri conflit che ja savoltât dal dut e in maniera indelebil il nostri teritori.

Ca l'aniversari da la prima vuera mondiâl no po jessi duncja ridot a un avveniment dome di interès storic, culturâl e parfin turistic. Se la prima vuera mondiâl ja tocjât dutis lis fameis (cuala fameia, lant indaûr di dôs o trê gjenerazions, no ja tra i parincj un soldât di allora e spes un colât in bataia?) e tantis zonis dal nord-est d'Italia son stadis teatri di bataiis (ancja il paîs d'origjin di mê mari, che si cjata su lis rivis da la Plâf di rimpet dal Grappa, 'l è stât distrut dopo Cjaurêt), di sigûr la nostra tiara ja paiât duramenti una vuera voluda da lis potenzis di allora. Una vuera – no stin dismenteâlu – che di chistis bandis, in chê volta part dal imperi austro-ungaric, 'l è scomenzada tal 1914 cu la partenza dai nostris zovins pal front orientâl in Galizia.

'L è duncja essenziâl par lis nostris comunitâts cjapâ l'ocasion dal aniversari da la prima vuera mondiâl par una profonda riflession scomenzant di una vision no dome storica e culturâl ma ancja religjosa e, in ogni mût, profondamenti umana, stant che il valôr da la pâs no ja un colôr religjos, ma 'l è un don di Dio pai oms e lis feminis di ogni timp.

La visita di papa Francesc al Simiteri austro-ungaric e la celebrazion da la Eucaristia al Sacrari di Redipua sarà ocasion preziosa par prudelâ la riflession, la preiera, l'azion par la pâs.

In chista letara volarès dome ufrî cualchi idea che nus judi a preparâsi a chê visita, tal impegn di rindi po l'insegnament di papa Francesc una guida pal nostri itinerari di pâs par chiscj agns.

Cualchi interrogatîf

I motîfs che jan discjadenât la prima vuera mondiâl son ancjamò cumò in studi dai storicis e si presentin pluitost complès. Tra i altris si podin citâ: l'imponisi dal concet di nazion fin a rivâ a nazionalisims esasperâts, il desideri di rivincita par via di conflits precedents, la crisi sociâl dai imperis centrâi, il cumul di armis cui interès relatîfs, la vision romantico-cavalescja da la vuera come "purificazion" eroica da la umanitât.

Ancja il pont di vista eclesiâl mereta di jessi studiât. Ze pensava allora la Glesia da la vuera? Parzè il magjisteri dal papa nol è stât scoltât e i soi sfuarz par evitâ il conflit (par altri

za di papa Pio X) o par siarâlu no jan vût efiet? Jara una posizion comuna tra i catolics? Trop son stâts determinants – par stâ dome al contest talian – fatôrs come la dotrina tradizionâl da la ”vuera justa” e l’impreparazion teorica tal valutâ sot l’aspîet morâl una maniera gnova di fâ la vuera, il desideri di mostrâsi leâi banda il gnôf Stât unitari talian (costruît cun fuartis carateristicis anti-catolicis), l’impegn di jessi in ogni câs solidâi cu la popolazion (si po ricuardâ la dedizion eroica di tancj capelans, di plevans e di vescui che no jan bandonât la lôr int)?

Nol è chist il lûc par dâ rispuestis a interrogatîfs dal gjenar e nancja par fâ ”procès” astorics a lis gjenerazions prima, ma ’l è impuartant mandâsi: se saltàs fûr cumò una situazion di possibil conflit, cuala sarès la nostra linia di condota come cristians, ma ancja come zitadins? Zitadins di una Republica che ta Costituzion aferma: «*L’Italia ripudia la vuera tant che strument di ofesa a la libertât di chei altris popui e tant che miez di risolucion da lis controversiis internazionâls; consint, in cundizions di paritât cun chei altris Stâts, a lis limitazions di sovranitât che son necessariis par un ordenament che siguri la pâs e la justizia tra lis Nazions; promôf e favorîs lis organizacions internazionâls che tindin a chist fin*» (art. 11) e di una Union Europeana che tal art. 3, coma 1 dal Tratât in vora declara: «*L’Union si propon di promovi la pâs*». E zemût disponisi davant di conflits che sanganin il mont in tiaris che nus son plui o manco dongja?

Tornant al prin conflit mondiâl dal secul passât (senza dismenteâ il secont): sin sigûrs che lis feridis di chê volta si sedin siaradis pardabon e no dome dismenteadis? Sin sigûrs che no sedi bisugna di altris pas su la via da la pâs propi ca di nô?

’L è clâr che apeî di massima a la pâs, a la riconciliazion, al perdon, a la fraternitât, no bastin. Come che no son utilis nostalgjiis nazionalisticis o patriotichis, oramai fûr dal timp, o posizions ingenuamenti pacifistis.

La Peraula di Dio

Un jutori fundamentâl par rispundi a chiscj interrogatîfs ven prima di dut da la Peraula di Dio, che ’l è diventada cjar tal Signôr Gjesù. Dome par fâ cualchi esempli e cun chê di sburtâ a un aprofondiment personâl e comunitari, volarès proponi trê tescj.

Il prin ’l è la profezia contignuda tal libri di Isaia (2,2-5):

*Tai tîmps a vignî,
la mont da la cjasa dal Signôr
sarà stabilida su la ponta da lis monts
e si alzarà sù parsora da lis culinis,
dutis lis ints coraran di jê.
Vignaran tancj popui e disaran:
«Vignî, anîn su la mont dal Signôr,
tal templi dal Dio di Jacop,
par che nus insegni lis sôs stradis
e che podìn lâ indevant pai soi trois».
Stant che di Sion vignarà fûr la lez
e di Gjerusalem la peraula dal Signôr.
Lui sarà judiz tra i forescj
e dezidarà di tancj popui.
Mudaran lis lôr spadis in sapis,
e lis lôr lanzis in falz;
una stirpe no alzarà plui la spada
cuntra di un’altra,
no praticaran plui la vuera.
Cjasa di Jacop, vignî,*

cjaminìn ta lûs dal Signôr.

Una profezia che fevela di pâs, ma che somea che rimandi dut «*taì tìmps a vignû*». La pâs, duncja, dome tant che un sium o al plui una speranza lontana? Sigûr che la pâs vera, no dome come assenza di vuera, ma come "shalom" cun dut chel che chist concet biblic compuarta in positîf, di concuardia, amôr, felicitât, serenitât, pleneza di vita, e v.i. sarà dome a la fin co si manifstarà finalmenti il ream di Dio. Ma za cumò esist la possibilitât di cjaminâ banda la pâs: «*Cjasa di Jacop, vignût, cjaminìn ta lûs dal Signôr*». No si dîs: "cjaminarin", rimandant dut al futûr, ma "cjaminìn", vuê. Un cjaminâ su lis "stradis" e i "trois" che il Signôr za vuê nus mostra midiant da la sô Peraula e dal so rivelâsi ta storia.

Trois che domandin un impegn in negatîf – «*no alzâ plui la spada cuntra di un'altra stirpe*», «*no praticâ plui la vuera*» –, ma massima in positîf, trasformant i struments di vuera in struments di pâs: «*mudaran lis lôr spadis in sapis, e lis lôr lanzis in falz*». Di solit capita il contrari: ta prima vuera mondiâl, purtrop, struments di lavôr pacific, come la sapa, la pala e il picon, son diventâts struments di vuera par sgjavâ lis trinceis e struments di fiesta, come lis cjampanis, son diventâts canons.

Un secont test 'l è dal apuestul Pauli, ta sô letara ai Efesins (Ef 2, 13-18):

Cumò invezi, in Crist Gjesù, vualtris che una volta jaris i lontans, sês diventâts i vizins, in grazia dal sanc di Crist.

*Di fat Lui 'l è la nostra pâs,
chel che ja fat di doi popui una sola unitât,
butant jù il mûr che ju divideva,
anulant ta sô cjar la inimicizia.
Cussì ja gjavât via i comandaments cui soi ordins,
par rivâ a creâ in se stes, di doi popui, un sôl om gnôf,
metintju in bunis,
e par riconciliâju ducj i doi cun Dio intun sôl cuarp,
midiant da la crôs,
dopo di vê eliminade in se stes la inimicizia.
Lui 'l è vignût par anunziâ la pâs
a vualtris che jaris lontans,
e pâs a chei che jarin vizins.
Midiant di Lui, ducj i doi podìn presentâsi
al Pari intun sôl Spirt.*

Il pas fâs riferiment a la situazion di rotura e di division di caratar religjôs, tra judeus e pagans: un «*mûr che ju divideva*» (una zitât come Guriza, dividuda in doi da la seconda vuera mondiâl, sa ben ze che sedi un mûr che separa...). Chê descrita somea una situazion manco grave di chê dovuda a una vuera, ma la sô letura a la lûs da la Pasca di Crist puarta l'apuestul a individuâ la lidrîs di ogni conflit, ancja di chel che 'l è tal cûr di ognidun: il pecjât, la lontananza di Dio che, come che insegnin i prins cjapitui da la Gjenesi, puartin a la rotura di ogni relacion: om-femina (Adamo ed Eva), fradi e fradi (Caino e Abele), om e creât (che diventa nemî, di gjavâgi fûr cun fadia il nudriment).

Sant Pauli dîs ancja cui che 'l è l'unic bon di sanâ chista "inimicizia" nativa tal cûr di ogni om e di ogni femina: Crist cul so sanc. Lui, murint su la crôs, ja trasformât il massim di mâl, di cjativeria e di injustizia (il sassini dal Fi di Dio inozent) tal massim dal amôr («*Dio infat gi ja volût tant di chel ben al mont, che ja dât so Fi, l'unigjenit*»: Gv 3,13). Il Crucifis «*ja anulât ta sô cjar la inimicizia*», chê inimicizia che nancja la Lez podeva scancelâ e che, anzi, contribuiva a rinfuarzâ metint un confin tra il popul elet e lis ints. Par chist e dome par chist, Crist – e la Glesia in ubidienza a Lui – po anunziâ la pâs ai vizins e ai lontans.

No po mancjâ, infin, il pas evangjelic fundamentâl par l'azion di pâs, chel da lis beatitudins (Mt 5,3-12):

*Fortunâts i puors tal spirt,
 parzè che il ream dai zîi 'l è di lôr.
 Fortunâts chei che vain,
 parzè che saran consolâts.
 Fortunâts chei che son bogns di cûr,
 parzè che ereditaran la tiara.
 Fortunâts chei che jan fan e sêt da la justizia,
 parzè che saran saziâts.
 Fortunâts chei che jan misericordia,
 parzè che cjatatan misericordia.
 Fortunâts i monts di cûr,
 parzè che viodaran Dio.
 Fortunâts chei che lavorin par la pâs,
 parzè che gi disaran fioi di Dio.
 Fortunâts chei che son perseguitâts par colpa da la justizia,
 parzè che il ream dai zîi 'l è di lôr.
 Fortunâts vualtris co us svilanaran, us perseguitaran e, cu la falsetât, disaran cuntra di
 vualtris ogni sorta di mâl par colpa mê. Stait contents e gjoldêt, parzè che granda 'l è la
 vuestra ricompensa tai zîi. Cussì di fat jan perseguitât i profetis prima di vualtris.*

Il tiarmin grêc che ven voltât cun «chei che lavorin par la pâs» ta Bibia si lu cjata dome tal test da lis beatitudins ta version di Mateu. Tal elenisim vigniva atribuît ai sorestants dai popui, a chei che vevin in man il podê e che fasevin la pâs... cu lis armis, vinzint lis vueris e imponint la pâs. Nol è sigûr chist chel che propon il Signôr, ma ben l'azion autentica par la pâs, che zîr la riconciliazion (tal Vanzeli di Mateu Gjesù domanda che si si riconcili cul fradi prima di puartâ l'ufiarta al altâr ancja co 'l è l'altri a vê alc cuntra di nualtris: cf Mt 5,23-24), che zîr la justizia (di chista ja fam e sêt), che dona misericordia, che 'l è clementa, che sopuerta la persecuzion. Dutis lis condotis descritis da lis beatitudins podin duncja jessi viodudis come espression esplicita e contignût dal operâ par la pâs.

Significativa ancja la precisazion: «*gi disaran fioi di Dio*». No si trata di un titul onorific, ma dal jessi come il Padri, bogns di volê ben parfin ai nemîs: «*Ma jo us dîs: amait i vuestris nemîs e preait par chei che us perseguitin, par che sedis fioi dal Pari vuestri che 'l è tai zîi*» (Mt 5,44-45). La perfezion che i dissepui son clamâts («*Sêt perfets come che 'l è perfet il Pari vuestri che 'l è tai zîi*»: Mt 5,48) 'l è la perfezion di cui che gi vûl ben a ducj senza distinzion (e no par nuia il vanzeli di Luca, tal pas paralêl – Lc 6,36 –, aferma: «*Vêt remission, come che ja remission il Pari vuestri*»).

L'insegnament atuâl da la Glesia

Da la Peraula di Dio diven dut chel che la Glesia fâs e insegna a rivuart da la pâs. Chiscj 100 agns jan viodût un aprofondiment da la riflession teologjica, che 'l è stada ripiada e dismota dal magjisteri, e un multiplicâsi di intervents e di posizions fuartis cjapadis in particolâr da banda dai Papis. Lis peraulis e i gescj di papa Francesc ta sô prossima visita constituissaran di sigûr un ulteriôr insiorament di chel che la Glesia pensa e fâs par la pâs in colaborazion cun tancj oms e feminis e istituzions religjosis e zivîls che desiderin costruîla.

Ancja in chist câs, senza nissuna pretesa di completeza, po jessi util spindi cualchi peraula su la atuâl cussienza eclesiâl in tema di pâs, cu la speranza che chistis evidenziacions sburtedin a un aprofondiment di cognossinza e di riflession.

Coventa prin di dut ricuardâ tant che l'insegnament da la Glesia, di Benedet XV al papa di cumò, sedi stât costant e univoc tal invocâ, sicu strument par la difesa da la pâs e la soluzion dai conflits, no la vuera e nancja lis pûr lodevulis iniziativas diplomatichis e multilaterâls, ma ben la realizazion di una mediazion internazionâl, dotada di un podê dât dai

singui Stâts, in maniera di frontâ i problemis no cu la fuarza da lis armis, ma da la inteligjenza e da la diplomazia cu la possibilitât di una concreta atuazion. In plui, za Benedet XV proponeva il disarmo gjenerâl e il mantigniment dai struments di muart «*dome tai limits domandâts dal mantigniment dal ordin public tai singui Stâts*» (Esortazion apostolica, *Dès le début*, prin di agost dal 1917).

Il Concili Vatican II puarta a maturazion la riflessione eclesiâl di prima afermant di una banda che «*ogni at di vuera che smira senza distinzion a la distruzion di intieris zitâts o di vastis regions e di cui che li stâ, 'l è delit cuntra Dio e cuntra la stessa umanitât e dêf jessi condanât cun fermeza e senza esitazion* » (GS 80), e di chê altra che «*fintant che esistarà il pericul da la vuera e no sarà un'autoritât internazionâl competente, furnida di fuarzis adatis, una volta esauridis dutis lis possibilitâts di un acuardi pacific, no gi si podarà dineâ ai governs il dirit di una legitima difesa*» (GS 79). Ancja la logjica da la dissuasion va superada, come par altri za visava papa Zuan XXIII ta *Pacem in terris*. La dissuasion, aferma il Concili, «*nol è via sigura par conservâ la pâs su basis solidis [...] lis causis di vueris invezzi di vignê eliminadis di una tâl corsa tindin pitost a lâ in piês un pôc a la volta [...] intant che si spindin patrimoniis enormis par procurâsi simpri armis gnovis, diventa po impossibil adusi rimiedi a lis miseriis cussì grandis dal mont di vuê*» (GS 81).

Pauli VI tal discors a lis Nazions Unidis dal 1965 afermava che la via da la costruzion dal «*ben comun universâl*» passa pal primât da la politica e dal ricors al dirit internazionâl: il superament dai conflits tra popui o nazions domanda la possibilitât di apelazion a Istituzions internazionâls metudis a garanzia da la justizia e da la pâs.

Su la stessa linia si poneva Zuan Pauli II la matina da la prima zornada da la vuera tal Golf (17 di zenâr dal 1991): «*In chistis oris di pericui grançj, volarès ripeti cun fuarza che la vuera no po jessi un miez bon par risolvi dal dut i problemis che esistin tra lis nazions. Nol è mai stât e no lu sarà mai. Continui a sperâ che chel che 'l è scomenzât vedi fin prima possibil. Prei par che l'esperienza di chist prin di di conflit basti par fâ comprendi l'orôr di chel che sta capitant e fâ capî la necessitât che lis aspirazions e i dirits di ducj i popui da la region sedin ogjet di un particolâr impegn da la comunitât internazionâl. Si trata di problemis che la soluzion po jessi cjetada dome intun contest internazionâl, là che dutis lis parts interessadis sedin presintis e lavoredin insieme cun lealtà*».

Papa Zuan Pauli II ja dât ancja indicazioni claris su la cussì clamada “ingjerenza umanitaria”. Intun intervent ai partecipants a la Conferenza internazionâl su la nutrizion dai 5 di dicembar dal 1992 afermava: «*Ben spes situazions là che mancja la pâs, là che la justizia ven sblefada, là che l'ambient naturâl ven distrut, metin popolazions intieris tal pericul seri di no podê sodisfâ lis dibisugnis alimentârs primariis. No bisugna che lis vueris tra lis nazions e i conflits internis condanin zivûi senza difesa a murî di fam par motîfs egoistics o di part. In chiscj câs, si devin garantî in ogni maniera i aiûts alimentârs e sanitaris e eliminâ ducj i ostacui, ancja chei che si justificin cul ricors arbitrari al principi da la no ingjerenza tai afârs internis di un paîs. La cussienza da l'umanitât, oramai sostignuda da lis disposizions dal dirit internazionâl umanitari, domanda che deventi obligatori l'intervent umanitari ta situazions che comprometin in maniera grave il sorevivi di popui e di intiêrs grups etnics: 'l è un dovê par lis nazions e la comunitât internazionâl*».

Il papa ja metût in evidenza cun fuarza, ancja cun ats significatîfs che mai (v la preiera par la pâs a Assisi tal otobar dal 1986), il rapuart tra la pâs e la religjon, cul invît ai fedêi di ogni confession di impegnâsi insieme a costruî un mont di justizia e di pâs superant divisions, roturis e erôrs dal passât.

Dal magjisteri di papa Benedet XVI no va dismenteât il colegament tra il tema da la pâs e chel da la custodia dal creât, evidenziât, par altri, tal discors par la zornada mondiâl da la pâs dal 2010: “*Se tu vûs la pâs, custodîs il creât*”. 'L è naturâl che dome la conservazion dal creât par ducj, ancja par lis gjenerazions futuris, e la distribuzion justa da lis risorsis e dai bens che

derivin, son premissis essenziâls par prevignî tancj conflits.

Par ultin 'l è significatîf pardabon il discors al Angelus di papa Francesc dal 4 prin di setembar dal 2013, in riferiment a la menacia di un intervent armât slargjât in Siria, discors che si concludeva invitant a una zornada di disun e di preiera: «*Vuê, cjârs fradis e sûrs, vuarès fâmi interprete da la invocazion che riva di ogni banda da la tiara, di ogni popul, dal cûr di ognidun, da l'unica granda famea che 'l è l'umanitât, cun preocupazion simpri plui granda: 'l è l'invocazion da la pâs! 'L è l'invocazione che dîs cun fuarza: vuarìn un mont di pâs, vuarìn jessi oms e feminis di pâs, vuarìn che in chista nostra societât, slambrada di divisions e di conflits, sclopi la pâs; mai plui la vuera! Mai plui la vuera! La pâs 'l è un don trop prezîôs, che dêf jessi promovût e tutelât. [...] Esist un judizi di Dio e ancja un judizi da la storia su lis nostris azions che no si po sghindâ! Nol è mai l'ûs da la violenza che puarta a la pâs. Vuera clama vuera, violenza clama violenza! Cun duta la mê fuarza, domandi ai contendents di scoltâ la vôs da la propia cussienza, di no siarâsi tai propis interes, ma di cjâlâ a chel altri come a un fradi e di scomenzâ cun cûr fuart e cun decision la strada dal incontro e dal negoziât, superant la vuarba contrapozizion. Cun fuarza compagna esorti ancja la Comunitât Internazionâl a fâ ogni sfuarz par promovi, senza spietâ massa, iniziativis claris par la pâs in chê Nazion, basadis sul dialic e sul negoziât, pal ben di duta la popolazion siriana».*

Un itinerari di pâs

Vuarès concludi chista letara proponint cualchi percors di pâs di meti in pratica za in preparazion da la visita di papa Francesc e po tal itinerari da la nostra Glesia tai agns che vignaran.

a. La preiera

La pâs 'l è don e va implorada. No nas da la nostra – par altri scjarsa – buna volontât. 'L è alc di flevar, che dome l'aiût di Dio po sigurâ. Tal cûr di ognidun di nualtris 'l è il pecjât in vuaita: basta pôc par che nus assalti. Lis lidrîs di ogni vizi son dentri di ognidun di nualtris. A chist che si zonti il pêd dal pecjât coletîf, chei mecanisims che, no vuarûts di nissun (o dome di pôcs), una volta metûts in moto 'l è cuasi impossibil fermâ: sentiments di odi, di svindic, di acusa a un indefinît "nemî", di paura, di insigureza. Dome il Spirt 'l è in stât di purificâ i cûrs, di inmorbidî i cûrs di clap, di riscjaldâ i cûrs di cjar. Coventa tanta preiera.

Una preiera che coventa ancja par purificâ la memoria. No si trata di dismenteâ o di fâ una ricostruzion storica atenta e minuziosa par viodi colpîs e colpevui. Bisugna domandâ al Signôr la fuarza di no judicâ, di perdonâ, di comprendi. Par butâ tal so cûr misericordiôs dut chel che di brut 'l è stât fat, dut chel che di cjatîf 'l è stât pensât, e fidâlu intun ziart sens dut intuna a Lui e a la sô misericordia, cu la cussienza dal mâl dât e patît (ancja di cui che nus ja precedût), ma senza la pretesa di analizâlu e judicâlu.

Ancja la preiera pai muarts in vuera 'l è fundamentâl. Ducj i muarts, i muarts di cualsisei banda. Di sigûr esist un particolâr dovê di preâ par cui che ja cun nualtris un leam di sanc, lenga, cultura. Ca, in chista tiara di confin, i leams si son incrosâts e no dovarès jessi difizil preâ pai muarts di cualsisei banda, stant che spes sin in rapuart cuntuna banda e cun chê altra. Desideri che in ogni comunitât parochiâl, in preparazion a la visita di papa Francesc e ancja dopo, si prei pai nostris defonts e par ducj i muarts di chistis tiaris, di là di ogni apartigninza. Ma che si prei ancja pai muarts dai conflits di vuê, di cualsisei banda: Dio no fâs distinzion di fioi.

b. La scolta da la Peraula di Dio

Dome la Peraula di Dio, acolta e preada, po cambiâ la nostra mentalitât. Bisugna meditâ sui tancj tocs che fevelin da la pâs (no dome chei citâts), ma ancja su chei che individuin e

denunziin i mecanisims dal odi, da la lota, da la supiarbia, da la violenza.

Dai tescj biblics, in particulâr dai Vanzelis, ven fûr la propuesta di una costruzion da la pâs che passa par fuarza traviars l'impegn solidâl da la propria vita. A chê pâs, che nol è come chê che da il mont, no si riva di sigûr cul mostrâ i muscui al "aversari", ma ben cu la preiera pal "nemî", la ativa condision da la dibisugna di chei altris, la solidarietât cul fradi misar. Una solidarietât dopo dut cjapada come criteri di judizi definitîf ta granda parabula di Mt 25,31-46 dulà che no il ricognossiment dal Fi di Dio, ma il servizi al fradi che ja fam, sêt, bisugna di acetazion, e v.i. diventa l'unica condizion par podê jessi ametûts tal Ream: dome il vê praticât la lez dal amôr consint di plasê a Dio, anzi di diventâ fradi, sôr e mari di Gjesù, di jessi vêrs operadôrs di pâs.

c. *La cognossinza dal insegnament e da l'azione da la Glesia*

Viodarìn in chiscj agns di vê plui ocasions par cognossi chel che la Glesia aferma e fâs par la pâs, scomenzant di chel che papa Francesc disarà ai 13 di setembar.

Ancja dome cjalâ indaûr i titui di cualchi discors che ogni an i Papis nus proponin in ocasion da la zornada da la pâs dal prin di zenâr, permet di intivâ in maniera sintetica la fuarza e il realisim di tâl insegnament: "La promozione dei diritti dell'uomo, cammino verso la pace" (1969), "Se vuoi la pace, lavora per la giustizia" (1972), "Se vuoi la pace, difendi la vita" (1977), "La verità, forza della pace" (1980), "Per servire la pace, rispetta la libertà" (1981), "Sviluppo e solidarietà: due chiavi per la pace" (1987), "Offri il perdono, ricevi la pace" (1997), "Dialogo tra le culture per una civiltà dell'amore e della pace" (2001), "Non c'è pace senza giustizia, non c'è giustizia senza perdono" (2002), "Combattere la povertà, costruire la pace" (2009), "Fraternità, fondamento e via per la pace" (2014).

Il riferiment al pensâ da la Glesia sul tema da la pâs 'l è impuartant par vê un judizi di fede, e una azion conseguente, su chel che 'l è capitât 100 agns indaûr, ma ancja su chel che purtrop capita ancjamò vuê. Il pericol di frontâ i conflits di vuê scomenzant da la mentalitât dal mont, dai condizionaments emotîfs favorîts dai miez di comunicazion sociâl, dai mûts di viodi di part 'l è simpri presint. Come ancja esist simpri il pericol di limitâ la nostra azion par la pâs a un no ben definît interès e a cualchi intenzion di preiera, senza cjapâsi sù un impegn atîf – ognidun cu lis propis responsabilitâts – tai confronts dal ben comun.

d. *Lis azions di pâs*

Cualis son lis azions di pâs che podìn fâ? Un pocjis son a la puartada di ognidun e di ogni comunitât. Par esempi, l'impegn a *cognossi* l'altri, che sedi il vizin, che sedi il talian, il sloven, l'austriac, e v.i. o l'egjizian, l'afghan, il somali, l'eritreu, e v.i. che scjampa di situazions di vuera e di fam. Cognossi l'altri: 'l è decisîf par la pâs. 'L è plui fazil sbarâ – pardabon o in maniera metaforica – a una saguma, a una "categoria", pitost che a una musa cognossuda. Dut chel che va a pro di una cressita di cognossinza, di dialic, di rapuart 'l è fundamentâl par vê la pâs. Intuna tiara come la nostra, cussì siora di virtûts umanis e cristianis, ma a voltis puartada a no jessi massa viarta banda il "forest", 'l è essenziâl fâ di dut par che si si cognossi e si si stimi un cun chel altri. Nol è roba che gi si riva subit: coventa un cjalâ indevant pazient e cuotidian, che nus judi a superâ la propension a meti etichetis a lis personis, di "pre-judicâlis" dome pal fat che apartegnin a una categoria, di vê cun lôr un prin contat negatîf dovût a alc che a voltis lu vin cjapât cul lat da la mari...

Cu la cognossinza 'l è fundamentâl l'*azet*. No un azet ingjenu e pacifist, ma un azet insieme prudent e ardît, che puarti a ricognossisi un cul altri. Un ricognossisi che si sfuarzi di capî i events epocâi che sin daûr a vivi (mi riferîs in particulâr al tema da la imigrazion), che sburti i responsabii a comedâ dut il possibil, ma che intant dedi sotet e judi cui che ja dibisugna senza se e senza ma. In cuala maniera resonin davant dai milions di personis che

emigrin da la lôr tiara, scjampant da la fam, da lis persecuzions e da la vuera? Son prin di dut ricognossûts sicu sûrs e fradis, part da la nostra famea umana, imagjin e someanza di Dio?

Cognossinza, azet, il tiarz non 'l è justizia. La pâs nas da la justizia, dal rispjet dai dirits di ducj e dal impegn di ducj pai propis dovês. La coreteza, la legalitât, l'onestât son ducj elements decisîfs par la pâs: dovîn domandâju ai altris, ma dovîn prin di dut viviju nualtris in prima persona.

Son po diviaris azions di pâs che gi spietin in particolâr a cui che ja determinadis responsabilîtats. Personis che però no van lassadis solis, ma sostignudis, confuartadis e stimuladis da la comunitât eclesiâl e zivîl. Mi limiti a fâ doi esemplis.

Prin di dut cui che ja responsabilîtats par lis politicis di difesa. Ta Glesia e ta societât zivîl 'l è just che sedin personis che assumedin posizions profetichis di reclam fuart ai valôrs da la pâs, prontis a paiâ ancja di persona. Ma tal stes timp devin jessi personis che cun realisim e speranza (no duncja un realisim cinic, ma un realisim evangjelic e uman), frontedin cun responsabilîtât lis sieltis ancja in cjamp militâr finalizadis a garantî la pâs ca e ta situazions di clara e sprolungjada injustizia. Zemût aplicâ l'art. 11 da la costituzion taliana? No ducj i modei di difesa e nancja ducj i armaments son adats a garantî la difesa da la pâs par nualtris e pai altris. In chist cjamp bisogna evitâ i doi estremis: dî di no simpri e in ogni câs, lassâ cori su cualsisei sielta. La comunitât cristiana e la comunitât zivîl intun stât democratic che ripudia la vuera, devin podê dî alc su lis sieltis da la difesa e dêf dîlu prin di dut cui che di chist ja la responsabilîtât.

Un secont esempli rivuarda i sistemis di comunicazion sociâl. Esperienzis dai ultins agns dimostrin – se fos ancjamò bisugna – come che i mass media, tradizionâi e modernis, sedin bogns di manipulâ cun fazilitât estrema lis emozions da la int, di fâ vignî fûr pauris e complès spes incussients, di costruî in pocjis zornadis il profil di un "nemî" che di lui si vedi paura, preannunziâ pericui no realistics. Ricuardi – alora jari a Milan – come che i media talians in ocasion da la prima vuera dal golf vevin in pôcs dîs creât ta opinion publica una tension e una paura cussì grandis di indusi a compuartaments irazionâi o almanco no justificâts: mi visi lis filis al supermercjât par fâ provisions di dut, come se la zitât podès jessi bombardada di una dî a chê altra.

Concludi ricuardant che la azion plui decisiva par la pâs 'l è chê educativa. Prin di dut chê diretta a lis gjenerazions zovinis, che par lôr 100 agns son cuasi un'era gjeologjica. Vignint ca a viodi i lûcs dulà che fantâts pôc plui grancj di lôr si jan copât intuna vuera assurda (me nono veva finît 18 agns in trincea e tancj jarin zovenuts tant che lui...), podin però capî che la pâs nol è una roba naturâl ma va costruïda di par dî, alora come vuê. Una azion educativa ancja pai grancj, stant che ancja par nualtris la pâs no po jessi una roba in fin dai conts concuistada par simpri e duncja logjica – vin ben altri di pensâ... –, ma il fundament dal vivi uman, spietant che si palesi par ducj la promessa di Dio, la promessa di Cui che " 'l è la nostra pâs": «*E po, daûr da la sô promessa, nualtris spietìn zû gnôfs e una tiara gnova, là che la justizia sarà di cjasa par simpri*» (2Pt 3,13).

Ai 28 di lui dal 2014

100 agns dal inizi da la prima vuera mondiâl

La Sposa dell'Agnello

*Suplement al numar 30 dai 26 di lui dal 2014 di Voce Isontina
diretôr Mauro Ungaro*